

國朝詞綜續編

冊一

國朝詞綜續編

四庫全書

國朝詞綜續編序

詩之流而爲詞肇始於唐至南北宋而盛自後體製隨時變易

欽定歷代詩餘一百二十卷賅博精審自唐迄明共采詞人九百餘家大旨歸之無邪一言義蘊閎大體裁嚴正焯乎懋矣

國朝人文蔚起詞學之盛亦復遠逮張柳近凌楊高王蘭泉司寇昭代詞綜一書沿竹垞太史詞綜之例搜采大備而百年以來海內詞人鱗集麀萃尚少續刊善本黃君韻甫以文章著稱兩瀾尤邃於詞學所箸倚晴樓集漱芳味腴務合閑軌邇來殿門著書日事觚翰取乾嘉以來詞綜未及登者蔚成巨編其規式悉依竹垞蘭泉兩先生選本故名之曰詞綜續編集中詞人幾及六百家君嘗言詞選最少而詞學則嘉道閒尤盛兼羅博收以防湮沒宗草窗絕妙好詞叔暘花庵詞選例也夫白雲黃竹卻曲迷陽雅騷之餘代有謠唱古不以詞名而詞意已濫觴於是凡皆不詭於正而已是編所錄悉以雅麗蘊藉爲準求合乎無邪之旨庶使工於詞者知我

朝文治蒸蒸經術詩賦而外詩餘一家亦實能超軼

曩軌津逮來學鼓吹揄揚體莫大焉豈直發潛闡幽
其苦心爲不可及哉書成索予言因約其大概而爲
之序年愚弟吳縣潘曾瑩撰

序

長短句肇自唐人顧其時如李青蓮之菩薩蠻憶秦娥白樂天之竹枝柳枝張志和之漁父等篇皆載之詩集不別爲一體洎乎五季詞格乃成其歧爲別集始於馮延巳之陽春詞其彙爲總集則始於趙崇祚之花間集自宋初以迄明季選家林立雅俗互陳

國初吾禾朱檢討彝尊采輯唐宋金元詞五百餘家編爲詞綜一書於各家專集及諸選本外凡裨官野紀中有片詞足錄者輒爲掇拾故多他選未見之作四庫全書總目稱其簡擇不苟遠勝花間草堂諸編迨嘉慶初青浦王侍郎昶復有

國朝詞綜明詞綜之刻選擇大旨一以檢討爲宗雖其書晚出不及登諸

四庫而近世倚聲家之奉爲準則則一如檢討之書顧自嘉道以還詞人輩出名章儁句流播旗亭而未嘗有薈之本吾友海鹽黃君韻甫病之於是採撫討議研覃數年纂成

國朝詞綜續編其姓氏已載前編者概不復列有補人而無補詞得五百八十六家凡二十有四卷甄錄澄汰一踵前規以繼侍郎者繼檢討遂以集千古詞

學之大成韻甫篤學好古自其少時已擅文譽尤工倚聲分別節度窮極窈眇所撰詩古文辭及其他著述填溢篋笥其女聳宗子城太守爲言咸豐辛酉賊再陷浙兩家相攜引避鄰邑一夕寇至倉皇具舴艋既盡室以行矣子城乘間復返至則逆旅主人先行曠黑無所覩觸手得一篋攜之出則是集稿本在焉後三年韻甫歿無子又八年子城謀梓是集屬予重加訂證而校讐點勘之役則屬之諸遲菊孝廉嗟乎粵逆之亂幾遍海內舊家藏稿散佚殆盡獨是集於轉徙流離之際厯劫幸存又得子城刊布而昌明之蓋不獨詞客有靈要亦檢討侍郎之靈有默爲呵護者矣昌黎云莫爲之前雖美弗彰莫爲之後雖盛弗傳今是編告成適際

武功大定文治日新他日重開

四庫行見與侍郎之書同登

天祿又不僅倚聲家之奉爲準則爾矣是爲序同治壬申十月平湖張炳堃

國朝詞綜續編序

自秀水朱竹垞太史選唐宋金元人詩餘爲詞綜三十六卷後之言詞者咸取則焉繼之者青浦王蘭泉少司寇復選詞綜補人二卷明詞綜十二卷

國朝詞綜四十八卷以補太史之所未及海鹽黃韻甫先生旁搜博採始順治訖咸豐集

國朝詞家之大成爲詞綜續編二十四卷補少司寇之所未備嗚呼盛矣先生文名卓著冠絕一時而是編之取舍大旨潘星齋侍郎張鹿仙都轉已詳言之不復贅余獨論是書之存有異焉者先生薈萃羣書歷十餘稔採取五百餘家彙鈔成帙將謀付梓而粵賊擾及江浙藏書家罔不焚如棄如先生以謄錄得縣令官湖北凡生平稿本悉付其婿宗子城太守子城居杭之候潮門外倉皇避寇挈眷遠徙將去而復返視其家無一物可攜持者顧几上有書一囊遂挾而出藏諸行篋蓋卽先生所付諸稿本也他日與先生眷屬同徙鄰邑一夕寇至是書又失而復得事詳子城題跋中先生游鄂久子城亦避難而來旅况蕭條無力開雕迨先生檄委宜都繼署松滋期滿回省遂歸道山又無子子城爲歸其棺先生所著倚晴樓

詩詞集及帝女花桃溪雪諸傳奇子城已次第刊行之蓋距先生之歿已踰十年而海內詞人日新月盛有爲是編所未及甄錄者子城又屬鹿仙都轉從而增訂之是書得蔚成鉅觀而無憾然則是書之存殆先生精靈之所呵護而不令其銷沈磨滅也夫亦異矣梓旣成余嘉子城付刻之功與汪氏晉賢之刻詞綜埒而遲蒞勘讎之力亦與周子柯子同其勞也爰紀其顛末而爲之序同治十二年歲次癸酉夏六月永康胡鳳丹序於鄂垣之紫藤仙館

序

國朝詞綜之有續編也韻甫黃先生實勘之網羅百
家紀錄當代穠纖畢具埤賢罔闕既免楚炬之難未
謀宋薊之精遺書在篋荏苒十稔宿草已豐縣貌百
武悲已爰逮客臘羣圖贊成都轉張公從爲哀纂同
里宗丈實任命剛走以不敏則頗校勘越歲歲工屬
之贅序余維鵲冠之飾資以衆羽狐襲之輝集諸千
腋良以維組匪獨繭之剝良琴有百衲之稱物固如
斯文亦宜爾是故岑樓命友事創昭明文苑豪華繼
之李昉填詞後起抉擇載繁花閒草堂蜚聲於曩喆
竹垞蘭泉標雋於今世外此種別恆心尚奢然而蛾
眉動魄則倩盼之兒不同芳草說魂而秘馨之氣各
異譬諸秦鑑受影難絕鹽煢之來秋蘭被塗孰禁蕭
艾之長詞選之難厥蔽惟五夫其翠謔紅笑好搜豔
歌粉怨珠唬但羅妍唱溺志丁孌之索塞耳秀師之
詞雅音不存哇響競奏古怨寫意閒情署題此則強
鬚眉之容塗飾粉黛襲閨房之語評騭履舄此一蔽
也或者矯宗辛劉蔑視秦柳衆牘魂壘乏縱橫之才
連篇踟躕無雄放之氣謂寶瑟不韻矜其箏琶謂瓊
琚可捐崇其劍佩斯猶甕牖畸士引怒蠅爲鼓吹幽

并少年結屠狗爲賓客此一蔽也迺至抗心邁古肆
力式靡吹花嚼蕊相炫虛華模山範水自詫澹遠眇
姜史之清俊等郊島之寒儉韻要眇而不幽思纏綿
而易盡是謂宋子名句僅此蘋末見賞南威淑姿必
以蓬葆稱嫩此又一蔽也握玉塵者惑清談之習唱
銅鞮者忘正始之源鬲指之聲訾石帚多事殺尾之
字以夢窗太嚴取快喉舌毀棄鍾呂又何童冠笏倚
胡牀之座絃匏攬羯鼓之過是曰踰閑難語同律則
亦一蔽也又吹求過刻驚博或夸光耀沈落非無天
外一鶴之表聲氣標榜不皆春初萬花之觀謝客山
居未登削簡南郭朝位乃備吹竽況之潮汐軒流則
麝雜蚌蠟培塿孤峙而希樹松柏此雖賢者之過亦
一蔽也今茲選錄悉祛五蔽祖國風之好色體楚辭
之緣情秋風起而雲飛明月墮而煙語擊轅之節迺
中韶濩叩槃之音斯協宮徵遐邇傳述凡飲水而能
歌甲乙秩如可畫壁而賭唱以之頡頏宋元研索顯
晦哲人有作靡得而譏下走幼耽舒歡長習徒歌江
湖尊酒之游遭之而未已風水霓裳之聽譜之而不
成輒敢多騁筆舌攻彈雅鄭夏蟲之知疇責冰雪斥
鷗之笑不踰枋榆其說得毋僂乎嗟嗟先生往矣知

音蓋希秋水樓臺闐寂無主曉風楊柳詠嘗有人所
願後之斫鱸取芳聚珠成采者引申其琴趣循守其
玉律匪特繼承之功易抑亦先生之志與
同治十二年閏月錢塘諸可寶遲鞠甫識於鄂州寓
廬

Blank manuscript page with vertical ruling lines.

國朝詞綜續編卷一

海鹽

黃燮清

編纂

吳縣

潘介繁

襄校

仁和

徐慶銓

編次

平湖

張炳堃

增訂

錢塘

諸可寶

校勘

永康

胡鳳丹

監刊

李昌垣三首

孫允恭一首

董文驥一首

錢珪一首

周積忠一首

宋寶穎一首

賀寬一首

錢陸燦一首

張一鵠一首

束廣一首

趙鑰一首

王又旦一首

黃京一首

董含一首

孫鈺一首

管捷一首

葉世倌一首

徐允貞一首

王著一首

季式祖一首

查容三首

丁裔沆二首

喬萊一首

湯思孝一首

陳孝逸一首

吳曹直一首

張台柱一首

李葵生一首

顧景星一首

孔衍棧一首

孔毓埏二首

湯寅二首

賀國璘三首

賀對達二首

蔡文熊一首

張發祖一首

葛筠三首

荆摺二首

徐賓一首

金烺一首

吳秉鈞一首

林企忠二首

閔榮一首

邵錫榮一首

諸葛義和一首

黃儀二首

王一元二首

李昌垣字長文宛平人順治四年進士官侍讀

鷓鴣天重陽晚眺遇雨

十里平蕪帶晚霞蕭蕭歸雁宿汀沙雨迷村外行人
渡花滿溪南處士家思往事負年華夢魂飄泊任
天涯西風吹換江州鬢獨醉東籬數暮鴉

南鄉子秋窗獨宿

風急透疏櫺翠帳香消夢乍驚獨擁寒衾疑是客淒
清露冷桐花月滿庭四壁亂蛩鳴古寺鐘聲半夜
鐙偶憶舊時今夕約傷情起弄秦簫曲未成

踏莎行冬懷

翠幙煙沈珠簾月小枝頭未雪梅開早凭闌無計遣
新愁亂鴉飛盡歸鴻杳霜杵敲寒風鏗破曉漏聲
滴盡鐘聲悄香殘酒醒不成眠流蘇好夢天涯少

孫允恭字子肅丹陽人順治六年進士官按察使

菩薩蠻 新柳

眉痕淡蹙嬌無力依依欲向愁邊說腰細不勝春東
風愁殺人 隋隄人去後秀色還依舊倦起倩誰憐
風風雨雨兩天

董文驥

字玉虬武進人順治六年進士官御史

憶王孫 春閨

空庭芳草憶王孫高院梅花早閉門欲報私書帶淚
痕正銷魂春風春雨又黃昏

錢

珪字紫曜武進人有白雪齋詞

南歌子 春暮

怕對韓憑魄愁聽蜀帝魂柳綿吹盡閉朱門斜倚鳳
花簫局度黃昏

周積忠字子厚松江人

生查子

昔年君在時兩兩飛春蝶同倚玉紗窗不道還離別
今年君去時楊柳花如雪酒後憶前情那忍看明

月

宋實穎字旣庭長洲人順治八年舉人

鷓鴣天新閨

南浦驚鴻賦洛神牀前銀燭照佳人海棠乍溼胭脂
雨荳蔻輕翻蝴蝶春百寶帳鏤金裙綠楊鶯囀畫
堂曛合歡羅勝初裁翦低喚卿卿細不聞

賀

寬字瞻度號拓菴丹陽人順治九年進士官

大理寺評事

沁園春與吳門錢均歷話舊

天懶雲癡積雨經旬孤舟未回想楊梅紅綻火齊顙
顙枇杷黃綴金彈纍纍著屐難行西園何在情思昏
昏眼倦開淒涼甚偶閒評往事節節堪哀當年與
致佳哉儘狂客風流好放懷憶湘靈年少錢山銘諧
辭雋語虎頭癡絕倩來吏部酒急詩催花裏韋孃樓
頭子晉吳四孃王昭王紫稼之屬一曲新歌暖玉杯
經過處只牆牽蘿薛徑掩莓苔

錢陸燦

字爾弢常熟人順治十四年舉人有圓沙

集

鷓鴣天北固晚眺

楊柳蕭條水拍天漁舟落網就人煙野田一半連魚

層估客逢迎換盤船 南郭璞北焦先西風率到葉
紅邊莫將日暮登臨恨去聽伊家十四絃

張一鵠字友鵠華亭人順治十五年進士官司李

有春詞秋詞

生查子 春閨

愁生芳草烟不共飛花掃雛鳥試春嬌睡起添煩惱
妝已成香未了簾捲晴光好一望柳條新遮住斜
陽道

束

廣字疎先號雲菴丹陽人順治十四年副貢
有池上生詞草

生查子 閨思

相思懶下牀春夢迷蝴蝶入柳又穿花去去輕如葉
可堪歧路長不道關山隔無賴是黃鸝喚起空愁
絕

趙

鑰字千門號南金萊陽人順治十五年進士
官司李

浣溪紗 春懷

二月輕寒江上知黃昏驛舍雨絲絲燭花入影兩相
欹柳挾黛烟千縷散桃霏紅雨一枝垂晝長香閣
憶當時